



**USAID**  
HUSI POVU AMERIKANU



## Esforsu no Dezafiu Adesaun Timor-Leste ba ASEAN “Husi Prespetiva Pilar Polítika-Siguransa no Ekonómiku”

Mahein Nia Lian Nú. 107, 20 Janeiru 2016



**Relatóriu Fundasaun Mahein Nia Lian ne'e suporta husi povu Amerikanu liu husi Ajénsia Estadus Unidus ba Dezenvolvimentu Internasional (USAID)**

**Vizaun husi autór sira ne'ebé expresa iha publikasaun relatório sira ne'e la reprezenta vizaun husi Ajénsia Estadus Unidus ba Dezenvolvimentu Internasional (USAID)**

**Fundasaun Mahein (FM)**

**Website:** [www.fundasaunmahein.org](http://www.fundasaunmahein.org)

**2015**



## Kontiudu sira

Kontiudu sira	2
Intodusau	3
Metodolojia	4
Rekezitu Adesaun no mudansa iha ASEAN	4
Esforsu Timor-Leste Adere ba ASEAN	6
Dezafiu Adeasaun ba ASEAN	8
Dezafiu wainhira sai membru ASEAN	10
Konkluzaun no rekomendasau	15
Bibliografia	16



## Introdusaun

*Associations of South East Asian Nations (ASEAN)* hanesan organizasaun rejionál ida ne'ebé fasilita kooperasaun entre NASAUN Sira iha Sudeste Áziatiku desde tinan 1967. Hahu dezejju hodi kria rejaun ida pasífika, NASAUN Sira asina Deklarasaun Bangkok hakarak serbisu hamutuk hodi alkansa kresimentu ekonómiku, dezenvolvimentu sosial-kultura, nomós paz no estabilidade iha rejaun, iha sumbriña ASEAN nian. ASEAN harii ho nia membru fundadór NASAUN lima maka Indonezia, Tailandia, Filipina, Malázia no Singapura. NASAUN lima foun seluk iha rejaun Sudeste Áziatiku iha tinan tuij mai adere mos ba ASEAN maka Brunei Darussalam (1984), Vietnam (1995), Laos, Myanmar (1997) no Kambodia (1999). To'o agora Estadu membru ASEAN hamutuk sanolu.<sup>1</sup>

Depois Timor-Leste restaura nia Independensia iha Ioron 20 Maiu 2002. Hatur prinsípiu fundamentál relasaun internasional nian, kaer metin ligasaun espesial kona-bá amizade no kooperasaun ho país viziñu sira no ho país sira iha rejaun. Defende solusaun pasífika ba konflitu, dezarmamentu jerál, simultáneu no kontroladu, establecimento ba sistema ba siguransa koletiva ida no kriasaun ba orden ekonómika internasional foun ida, ne'ebé bele kaer metin paz no justisa iha povu sira nia relasaun.<sup>2</sup>

Aspirasaun hamutuk ho ASEAN desde tinan 1975, Timor-Leste afima tiha ona nia pozisaun hamutuk ho ASEAN. Portantu ASEAN hanesan forsa importante ida hodi hametin paz no estabilidade iha rejaun.<sup>3</sup> Maske nune'e liu deit Ioron balu membru fundadór prinsipal ASEAN nian ida halo kedas invazaun no okupa durante tinan 24 nia laran.<sup>4</sup>

Aspirasaun Timor-Leste hamutuk ho ASEAN tanba lokalizasaun jeográfika, dezejju lider no Timor-oan sira nian no relasaun cultura ho NASAUN Sira viziñu. Maske nune'e, jeografikamente Timor-Leste lokaliza iha Sudeste Áziatiku to'o agora, hanesan úniku NASAUN ne'ebé la'ós membru ba ASEAN.<sup>5</sup>

Nune'e iha Jullu 2005 sai nu'udar membru Forum Rejionál ba ASEAN (ARF) no asina Tratadu Amizade no Kooperasaun ASEAN iha tinan 2007. Iha Marsu tinan 2011, Timor-Leste entrega ofisialmente pedidu adesaun ba ASEAN no kontinua ho meta prioridade política externa, hodi fomenta interesse estratégiku sira ba longu prazu nian. Adesaun ba ASEAN fo asesu ba debate sira forum rejionál, iha kestaun importante sira hanesan siguransa, dezenvolvimentu, integrasaun ekonómiku no asuntu sira sosial-kultural.<sup>6</sup>

<sup>1</sup> Istoria kona-bá funda ASEAN. Disponivel iha: <http://www.asean.org/asean/about-asean/history>. Asesu iha Ioron 4 fulan Novemburu tinan 2015.

<sup>2</sup> Konstituisaun Repúblika Demokrática Timor-Leste, artigu 8.

<sup>3</sup> Horta, Jose Ramos. Entrevista Jornalista Tony Smith husi Television One, New Zealand. Dili, tinan 1975. Disponivel iha: [https://www.youtube.com/watch?v=mavWhk\\_JBYk](https://www.youtube.com/watch?v=mavWhk_JBYk). Asesu iha Ioron 3 fulan Novemburu tinan 2015.

<sup>4</sup> Indonezia halo invazaun iha Timor-Leste, iha Ioron 7 fulan Dezembru tinan 1975.

<sup>5</sup> Planu Estratégiku Dezenvolvimentu Nasional (PEDN) Timor-Leste 2012 – 2030.

<sup>6</sup> Hanesan deskreve iha footnote 4.



Hafoin entrega pedidu adesaun ho ambisaun ida tinan 2012 Timor-Leste adere ba ASEAN. Maibé ambisaun ida ne'e to'o agora seidauk hetan "luz verde" husi Estadu membru sira ASEAN nian. La signifika rejeita adesaun ba ASEAN maibé haree ba preparativu sira husi Timor-Leste rasik. Ho ida ne'e estadu membru balu hanesan Singapura sei iha objesaun ba Timor-Leste nia adesaun. Tanba sei difikulta esperansa ASEAN nian hodi estabelese Komunidade Ekónomiku ASEAN iha tinan 2015.<sup>7</sup> Portantu nasaun ida atu sai membru ba ASEAN tenke hetan konsensu entre estadu membru sira husi Simeira ASEAN nian, tuir rekomendasau KonSELLU Koordenasaun ASEAN hanesan hatete tiha ona iha ASEAN Charter.<sup>8</sup> Nune'e to'o agora estatutu Timor-Leste nian iha forum sira ASEAN nian hanesan Observador.<sup>9</sup>

Nune'e, saida maka sai hanesan dezafiu ba Timor-Leste hodi adere ba ASEAN? Maske pedidu adesaun hato'o tiha ona iha tinan lima liu ba (2011) maibé to'o agora seidauk hetan konsensus husi estadu membru ASEAN sira hodi simu Timor-Leste nia adesaun. Ho ida ne'e, relatório ne'e sei deskreve kona-bá esforsu Timor-Leste nian adere ba ASEAN no dezafiu sira ne'ebé difikulta Timor-Leste nia adesaun. Iha sorin seluk, relatório ne'e mos sei deskreve dezafiu sira wainhira Timor-Leste sai membru ASEAN. Ikus liu ho rekomendasun sira.

### **Metodolojia**

Metodolojia ne'ebé adopta iha relatorio ida ne'e rekolla no análise literatura no dokumentu sira estadu nian hanesan Konstituisaun RDTL, Lei sira, Planu Estratéjiku Dezenvolvimentu Nasional (PEDN) Timor-Leste, diskursu ofisiál sira, relatório media no dukementu sira relasaun ho ASEAN iha parte pilar políтика-siguransa no ekonómiku, opiniaun ka artigu sira kona-bá ASEAN husi organizasaun ka instituisaun nasional no internasional sira. Nune'e hodi konklui relatório ida ne'e liu husi metodo ne'ebé Fundasaun Mahein (FM) adopta maka *Security Sector Discussion* (SSD) iha ne'ebé involve peskizador sira husi FM rasik.

### **Rekezitu Adesaun no mudansa iha ASEAN**

Hanesan introdus tiha ona iha sesaun dahuluk relatório ne'e nian, Deklarasaun Bangkok Ioron 8 Agustu 1967 nu'udar baze hodi harii Organizasaun ASEAN. Ho nia objetivu dezenvolvolve kresimentu ekonómiku, progresu sosiál no dezenvolvimentu kulutral ba rejiaun, liu husi esforsu sira konjunta no ho espíritu igualidade no kooperasaun, fortalese baze ba komunidade ida prosperu.<sup>10</sup> Desde ASEAN hamrik iha tinan 1967, afirma tiha ona katak ASEAN nakloke ba partisipasaun NASAUN hotu-hotu iha rejiaun Sudeste

<sup>7</sup> Global Risk Insights. Timor-Leste bids for ASEAN membership. Disponivel iha: <http://globalriskinsights.com/2015/11/timor-leste-bids-for-asean-membership/>. Asesu iha Ioron 4 fulan Novemburu tinan 2015.

<sup>8</sup> ASEAN Charter, artigu 6, n.º 3.

<sup>9</sup> CNN Indonezia. Menlu RI Upayakan Keanggotaan Timor-Leste di ASEAN. Disponivel iha: <http://www.cnnindonesia.com/internasional/20150730161241-106-69149/menlu-ri-akan-upayakan-keanggotaan-timor-leste-di-asean/>. Asesu iha Ioron 5 fulan Novemburu tinan 2015.

<sup>10</sup> Planu Estratéjiku Dezenvolvimentu Nasional (PEDN) Timor-Leste 2030.



Aziatiku atu sai membru ba ASEAN. Ho nia rekezitu katak NASAUN ne'e respeitu ba prinsípiu no objetivu sira ASEAN nian ne'ebé hatur tiha ona iha deklarasaun no desizaun konjunta sira ASEAN nian.

Nune'e rekezitu sira ne'ebé hatur iha ASEAN Charter artigu 6, atu simu estadu ida sai membru tenke tuir kritériu sira hanesan lokalizasaun jeográfika iha rejiaun Sudeste Aziatiku, rekuñese husi Estadu membru ASEAN nian, aseita hodi hakesi no hakruk ba ASEAN Charter, prontu no vontade hodi realiza obrigasaun sira hanesan estadu membru. Nune'e mos atu simu estadu ida sai hanesan membru hakotu ho konsensu husi Simeira ASEAN nian, tuir rekomentasaun Konsellu Koordenasaun ASEAN nian.<sup>11</sup>

Ho mudansa ne'ebé akontese iha ASEAN hakat ona ba etapa foun ida ne'ebé integradu ho vizaun ida ba futuru, maka Komunidade ASEAN 2015 (ASEAN Community 2015). Komunidade ASEAN harii iha tinan 1997 ho Vizaun 2020 no konfirmadu iha tinan 2003 iha Simeira ba dala-9 ASEAN nian iha Bali. Komunidade ASEAN nia objetivu hodi kria komunidade ida ne'ebé vizioner, moris iha ambiente ne'ebé dame, estavel, no prospreeu, ne'ebé unidu husi relasaun parseria ida dinâmika no kria kuidadu mutual ida entre komunidade.

Komunidade ASEAN kria hodi estabelese integrasaun ASEAN hodi hasoru mudansa konstelasaun política internasional. Ho ida ne'e, estabelesementu Komunidade ASEAN ho baze pilar tolu maka pilar Polítka – Siguransa, Pilar Ekonómiku, no Pilar Sosiu Kultural. Komunidade ASEAN ho nia lema/motto “Vizaun Ida, Identidade Ida, Komunidade Ida”.<sup>12</sup> Kada pilar sira ne'e iha nia fundasaun ka *blueprint* idak-idak ne'ebé integra hamutuk ho Inisiativa Integrasaun ba ASEAN ka the Initiative for ASEAN Integration (IAI) Strategic Framework and IAI Work Plan Phase II (2009-2015). Nune'e pilar tolu ne'e nia liña jeral maka tuir mai ne'e:

1. Pilar Komunidade Polítika-Siguransa ho nia objetivu hodi alkansa paz iha rejiaun no komunidade internasional ho nia instrumentu sira hanesan zona livre arma nuklear iha rejiaun Sudeste Aziatiku, deklarasaun area paz, livre no neutru, tratadu kooperasaun amizade Sudeste Aziatiku Komisaun Direitus Umanus entre membru ASEAN, no jestau ba konflitu Tasi Sul Xina.
2. Pilar Komunidade Ekonómiku ho nia objetivu atu realiza integrasaun ekonómiku ASEAN ba prospriedade ho karakterística bazika haat maka sei realiza hanesan merkadu úniku no baze ba produsaun, rejiaun ekonómiku kompetetiva, dezenvolvimentu ekonómiku ekuitativu, no integrasaun iha ekonomia global.

---

<sup>11</sup> The ASEAN Charter, artigu 6 versaun orijinal iha Lingua Ingles no Lingua Ofisial Estadu membru sira.

<sup>12</sup> ASEAN Community 2015. Disponivel iha: <http://www.asean.org/asean/about-asean/overview>. Asesu iha lorn 28 fulan Outobru tinan 2015.



3. Pilar Komunidade Sosiu-Kultural ho nia objetivu hodi halo komunidade ASEAN ne'ebé solidariu no partisipasaun iha dominiu sira juventude, feto sira, empregu, informasaun, kultura, edukasaun, siénsia no teknolojia, meiu ambiente, dezastre naturais no seluk-tan ne'ebé realiza ho atitude "We Feeling" ba sidadaun sira ASEAN.

Ida ne'e atu hatete katak objetivu ida husi komunidade ASEAN maka estabelese identidade úniku hanesan sidadaun ASEAN ne'ebé iha vizaun ida. Ida ne'e ho esperansa ida bele redus konflitu sira ne'ebé durante ne'e akontese entre NASAUN sira ASEAN liu husi pilar Polítika-Siguransa. Alende ida ne'e, oportunidade atu mellora prospriedade nomós nakloke ba komersiu livre iha área ekonómiku. Ho kuota merkadu ne'ebé luan, klaru katak sei mellora komersializasaun ne'ebé kompetetiva. Nune'e mos kooperasaun iha área sira sósio-kultural sei mellora tolerânsia no sosiedade sivilizada no tane-as aspetu sentimento umanidade. Maske nune'e no sai hanesan pergunta, serake Timor-Leste prontu atu hasoru Komunidade ASEAN ho limitasaun sira ne'ebé iha?

### **Esforsu Timor-Leste Adere ba ASEAN**

Esforsu lubuk ida ona Timor-Leste halo hodi adere ba ASEAN tantu iha nível rejionál no nasional. Hodi afirma Timor-Leste nia vontade adesaun ba ASEAN no hanesan prioridade política esterna estadu nian.<sup>13</sup> Esforsu sira adesaun iha nível rejionál hahu estabelese gabinete ida ligasaun ba Sekretariadu ASEAN, iha Jakarta.<sup>14</sup> Nune'e mos to'o agora kuaze estabelese hotu ona embaixada iha Estadu membru sira ASEAN nian no prosesu nomeasaun ba embaxadór sira dadaun ne'e la'o hela.<sup>15</sup> Partisipa ativu mos iha forum sira ASEAN hanesan ASEAN Regional Forum (ARF) desde tinan 2005 no enkontru ARF ba dala 5 hala'o iha Dili<sup>16</sup> inklui enkontru sira entre ministru relevante sira iha ASEAN nian.

Nune'e mos iha tinan 2007 asina tratadu ba amizade no kooperasaun (*Treaty of Amity and Cooperation/TAC*), hakbesik liu tan Timor-Leste ba ASEAN. TAC hanesan mata dalan ba relasaun entre NASAUN sira nune'e mos instrumentu diplomátiku atu halo promosaun paz no establidade iha rejaun.

---

<sup>13</sup> Vise Ministru Negósiu Estranjeiru no Kooperasaun, Roberto Soares ko'alia iha Sorumutu Nivel Alto – Forum Rejionál ASEAN. Disponivel iha: <http://timor-leste.gov.tl/?p=12536&lang=tp>. Asesu iha loron 4 fulan Novembru tinan 2015.

<sup>14</sup> Planu Estratéjiku Dezenvolvimentu Nasional (PEDN) Timor-Leste 2012 – 2030.

<sup>15</sup> Primeiru Ministru Dr. Rui Maria de Araújo hato'o ba média nasioál hafoin fila husi vizita iha Indonezia no Sekretariadu ASEAN nian. Disponivel iha: <http://www.indiario.com/2015/08/31/tl-bele-sai-memburu-asean-tinan-nee/>. Asesu iha loron 26 fulan Outobru tinan 2015.

<sup>16</sup> Fórum hus ASEAN iha Dili importante tebes ba país. Disponivel iha <http://noticias.sapo.tl/tetum/info/artigo/1124342.html>



Esforsu no ambisaun adesaun ba ASEAN la'ós iha nivel diplomática deit maibé instituisionaliza iha programa Governu Timor-Leste nian. Dahuluk, iha tinan 2009 estabelese Sekretariadu Nasionál ASEAN (SNA) iha Gabinete Ministériu Negósiu Estranjeiru no Kooperasaun (MNEK). SNA funsiona hodi intensifika preparativu sira adesaun ba ASEAN.<sup>17</sup>

Daruak, esforsu sira ne'e la'o dadauk, iha tinan 2012 wainhira Governu foun simu pose asuntu ASEAN sai hanesan Sekretáriu Estadu ketak ida iha MNEK nia okos. Ho naran Sekretáriu Estadu ba Asuntu ASEAN lidera husi Dr. Roberto Sarmento de Oliveira Soares, atual Vise-MNEK. Esforsu no ambisaun ida ne'e sai mos hanesan kampaña nacionál no sensibiliza ba komunidade Timor-Leste kona-bá asuntu ASEAN.<sup>18</sup> Nune'e mos kria liña koordenasaun entre insituisaun estadu sira no pontu fokal nacionál ba informasaun hotu kona-bá kestaun ASEAN, atu koordena implementasaun política ASEAN nian iha nivel nacionál. Pontu fokal ASEAN mai husi reprezentante instituisaun governu.

Prosesu ida ne'e, Timor-Leste hanesan úniku NASAUN ne'ebé nia prosesu rigorozu tebes kompara ho NASAUN membru sira seluk. Brunei Darussalam hafoin proklama nia independensia liu Ioron neen sai membru ASEAN. Iha ne'ebé proklamasau independensia iha Ioron 1 Janeiru 1984 no sai membru ASEAN iha Ioron 7 Janeiru 1984.<sup>19</sup>

Esforsu husi Estadu membru ASEAN sira, Indonezia hanesan NASAUN dahuluk apoiu Timor-Leste nia adesaun no dudu maka'as estadu membru seluk hodi apoiu adesaun ne'e. Tuir kadas Estadu membru seluk ne'ebé apoiu Timor-Leste nia adesaun maka Malazia, Tailandia no Filipina. Enkuantu estadu membru seluk sei dúvida ba Timor-Leste nia pasadu no estabilidade.<sup>20</sup>

Timor-Leste nia adesaun sai debate maka'as mos iha forum sira ASEAN nian entre Estadu membru sira ho análise ida rigorozu ho idak-idak nia prespetiva husi pilar importante sira ASEAN nian. Nune'e esforsu husi ASEAN rasik, halo ona avaliaasaun ba Timor-Leste kona-bá ninia preparativu sira. Avaliaasaun ne'e hodi fo serteza situasaun no

---

<sup>17</sup> PRESS RELEASE. Timor-Leste opens ASEAN National Secretariat to intensify its preparations to join ASEAN. ASEAN Secretariat, 2 February 2009. Disponivel iha: <http://www.asean.org/archive/PR-TimorLeste-1.pdf>. Asesu iha Ioron 5 fulan Novemburu tinan 2015.

<sup>18</sup> Diskursu husi Sekretáriu Estadu ba Assuntu ASEAN, Roberto Sarmento de Oliveira Soares, Iha Ioron Internasional ba Trabalhador, Dili, 2014.

<sup>19</sup> ASEAN Member States. Disponivel iha: <http://www.asean.org/asean/about-asean/overview>. Asesu iha Ioron 30 fulan Outobru tinan 2015.

<sup>20</sup> CNN Indonesia. Keanggotaan Timor-Leste di ASEAN Tinggal Tunggu Waktu. Disponivel iha: <http://www.cnnindonesia.com/internasional/20150828161413-106-75220/keanggotaan-timor-leste-di-asean-tinggal-tunggu-waktu/>. Asesu iha Ioron 28 fulan Outobru tinan 2015.



kondisaun atual Timor-Leste nian antes fó estatutu nu'udar membru ASEAN. Portantu durante ne'e seidauk iha konsensu husi Estadu membru sira ASEAN nian.<sup>21</sup>

Avaliasaun dahuluk husi pilar ekonómiku nian no pilar política - siguransa iha tinan klaran 2015 no tuir kendas avaliasaun ba pilar sosiu – kultural ne'ebé konklui ona iha tinan rohan 2015.<sup>22</sup> Maske nune'e, rezultadu avaliasaun dahuluk ba pilar rua ekonómiku no política – siguransa to'o agora seidauk pública no hanesan segredú ba Timor-Leste.

Nune'e mos adesaun Timor-Leste ba ASEAN sai hanesan ajenda prinsipal husi ASEAN 2025. Iha ne'ebé sei kontinua serbisu iha Ekipa Traballu Konsellu Koordenasaun ASEAN ka *ASEAN Coordinating Council Working Group* hodi konsidera nafatin Timor-Leste nia pedidu adesaun no partisipasaun iha atividade sira ASEAN nian.<sup>23</sup>

### **Dezafiu Adesaun ba ASEAN**

Saida maka sai hanesan dúvida no objesaun ba Timor-Leste nia pedidu hanesan dezafiu adeasaun ba ASEAN? Wainhira Timor-Leste hato'o pedidu adesaun iha tinan 2011, iha momentu hanesan foin sai husi konflitu interna. ASEAN sei dúvida no iha objesaun ba Timor-Leste nia adesaun. Portantu dúvida no objesaun hirak ne'e liga ho situasaun política no siguransa interna Timor-Leste nian. Hakait ho konflitu pasadu ne'ebé Timor-Leste liu dadauk ho konkluzaun ida katak pedidu Timor-Leste nian presiza haree fila fali liu-liu estabilidade política no siguransa.<sup>24</sup>

Atualmente situasaun política no siguransa iha Timor-Leste iha mudansa signifikativu tebes husi situasaun anterior nian ho lema “adeus konflitu bemvindu ba dezenvolvimentu”. Maske nune'e estabilidade política no siguransa sei sai hanesan ajenda ba tempu naruk no sei sai hanesan pergunta husi parte balu. Ho hanoin seluk “estabilidade política no siguransa depende ba figura A ka B” iha kontestu lideransa nasional ne'ebé bele garante estabilidade nasional”.

Ho dinâmika política no siguransa Timor-Leste dadaun ne'e, sei iha presepsaun seluk kona-bá instituisaun sira estadu nian sei “vulniravel” monu ba konflitu. Ho preokupasaun sei iha potensia hanesan dezafiu ba esforsu hodi sai Komunidade ASEAN. Partikularmente iha pilar Polítika-Siguransa ASEAN ne'ebé ho nia objetivu hodi asilera kooperasaun política siguransa iha ASEAN no estabilidade rejiaun iha ambiente ida ne'ebé demokrátiku, justu no harmonia. Ho hanoin hirak ne'e sai hanesan sasukat ba estadu membru sira ASEAN hodi simu Timor-Leste nia adesaun.<sup>25</sup>

Iha sorin seluk, estadu membru ASEAN balu sei preokupa kona-bá Timor-Leste nia

<sup>21</sup> Hanesan deskreve ona iha footnote 12.

<sup>22</sup> Jornal Suara Timor Lorosa'e (STL). Avaliasaun ASEAN ba Timor-Leste Ramata. Pública iha Iorom 8 Janeiru 2016.

<sup>23</sup> ASEAN 2025: FORGING AHEAD TOGETHER. The ASEAN Secretariat Jakarta, 2015.

<sup>24</sup> Universitas Pembangunan Nasional “VETERAN” - Indonesia, 2012.

<sup>25</sup> Universitas Pembangunan Nasional “VETERAN” - Indonesia, 2012.



preparativu hodi simu estatutu hanesan membru ASEAN. Estadu membru ASEAN balu hanesan Singapura rekomenda ba estadu membru ASEAN sira hodi haree fila fali Timor-Leste nia pedidu adesaun. Liu-liu preparasaun husi Timor-Leste “seidauk prontu” atu hasoru dezafiu no kompleksidade sira iha ambiente ASEAN nian. Partikularmente esforsu ASEAN nian hodi forma Komunidade ASEAN iha tinan ho nia pilar Komunidade Polítika – Siguransa ASEAN (APSC<sup>26</sup>), Komunidade Ekonomiku ASEAN (AEC<sup>27</sup>), no Komunidade Sosial – Kultural ASEAN (ASCC<sup>28</sup>). Maske nune'e, la signifika Singapura la aseita Timor-Leste nia pedidu adesaun maibé sei iha objesaun ba Timor-Leste nia preparativu sira hodi aliña ho mudansa ne'ebé akontese iha ASEAN.<sup>29</sup>

Portantu ko'alia kona-bá preparativu husi Timor-Leste signifika hodi kumpri obrigasaun sira hanesan estadu membru wainhira sai hanesan membru ASEAN. Nune'e aspetu preparativu fundamental tebes ba Timor-Leste hodi serbisu maka'as wainhira ASEAN hetan konsensu hodi simu Timor-Leste hanesan estadu membru.

Husi situasaun ne'ebé deskreve iha leten, serake Timor-Leste hanesan obstaklu ba Komunidade ASEAN? FM fiar katak ho avaliasaun tolu ne'ebé halo husi péritu sira ASEAN sei fó konkluzaun ba Timor-Leste nia situasaun política no siguransa inklui preparativu sira husi Timor-Leste.

Iha âmbitu ida ne'e situasaun política no siguransa, atualmente Timor-Leste goza dadaun iha ambiente ida paz no harmonia no aselera dezenvolvimentu nasional tuir metas sira ne'ebé difine ona iha Planu Estratégiku Dezenvolvimentu Nasional (PEDN) 2030. Kompara dook tebes husi situasaun anterior iha tinan 2011 wainhira Timor-Leste hato'o pedidu adesaun ba ASEAN. Iha ne'ebé mosu presepsaun no preokupasaun seluk kona-bá Timor-Leste nia situasaun política no siguransa ne'ebé iha potensia sei sai hanesan obstaklu ba Komunidade ASEAN.

Inklui preparativu sira la'ós deit iha nivel diplomátku maibé preparativu sira “uma laran” husi Timor-Leste rasik liu husi pontu fokal ne'ebé governu estabelese ona iha liña ministerial hodi aliña ho política nasional no ASEAN rasik. Husi preparativu hirak ne'ebé la'o dadauk, nune'e loron ruma ASEAN rasik maka lori Timor-Leste sai membru ASEAN.<sup>30</sup> Nune'e mos hanesan hato'o tiha ona husi ulun boot Timor-Leste nian kestaun adesaun ba ASEAN la'ós “prontu ka lae” maibé “bainhira Timor-Leste adere ba

<sup>26</sup> Sigla original iha lingua Ingles – APSC (ASEAN Political – Security Community).

<sup>27</sup> Sigla original ha lingua Ingles – AEC (ASEAN Economic Community).

<sup>28</sup> Sigla original ha lingua Ingles – ASCC (ASEAN Social – Cultural Community).

<sup>29</sup> ASEAN Belum Siap Terima Timor Leste. "Saya tidak melihat penolakan, hanya masalah timing dan kesiapannya dari kedua belah pihak." Disponivel iha: <http://dunia.news.viva.co.id/news/read/219287-asean-belum-siap-terima-timor-leste>. Asesu iha loron 15 fulan Novemburu tinan 2015.

<sup>30</sup> Relatório Media Suara Timor Lorosa'e (STL), 2013. Sedu Ou Tarde TL Sai Membru ASEAN. Disponivel iha: <http://jurnal.suara-timor-lorosae.com/sedu-ou-tarde-tl-sai-memburu-asean-sea-sosializa-ba-akademiku/>



ASEAN".<sup>31</sup>

## Dezafiu wainhira sai membru ASEAN

Prosesu adesaun Timor-Leste ba ASEAN dadaun ne'e la'o hela no avaliaasaun ba preparasaun husi Timor-Leste ramata ona iha tinan rohan 2015. Husi avaliaasaun ne'e sei fó konkluzaun ba Timor-Leste nia preparativu no bele konvense estadu membru sira ASEAN hodi hetan konsensu ba Timor-Leste nian adesaun hanesan membru ASEAN.

Nune'e wainhira Timor-Leste sai membru ASEAN la'ós deit adopta norma bázika sira, objetivu no política ASEAN nian maibe kumpri mos obrigasaun sira hodi hala'o regra ne'ebé aplika iha ASEAN hanesan estadu membru. Kestaun ida ne'e kestiona beibeik husi estadu membru sira hanesan Singapura iha enkontru prinsipal sira ASEAN nian. Portantu liga nafatin preparativu husi Timor-Leste hodi hasoru dezafiu ne'ebé kompleksu iha ASEAN no implementa obrigasaun sira hanesan estadu membru.

Relatóriu ne'e identifika dezafiu lubuk ida, Timor-Leste sei hasoru wainhira sai membru ASEAN. Liu-liu pilar sira husi Komunidade ASEAN nian ne'ebé liga direta ho situasaun política-siguransa, no ekonomia. Portantu buat hirak ne'e hotu hakait ho kondisaun atual Timor-Leste nian no wainhira sai hanesan membru ASEAN sei hasoru dezafiu hirak ne'e.

### 1. Situasaun política no siguransa ASEAN

Sai membru ASEAN signifika hola parte mos iha problema sira iha rejiaun ASEAN. Nune'e problema sira iha rejiaun ASEAN, Timor-Leste nia problema mos. Imposivel Timor-Leste ignora no konsidera problema rai seluk nian. Portantu ida ne'e hanesan obrigasaun no responsabilidade ida husi Timor-Leste hanesan estadu membru. Iha ne'ebé hatur tiha ona iha prinsípiu ASEAN nian katak problema sira iha rejiaun hanesan responsabilidade koletiva ida husi membru ASEAN hodi reforsa paz no siguransa iha rejiaun.<sup>32</sup>

Portantu iha setór defeza no siguransa ita bele haree katak situasaun siguransa global no iha rejiaun karakterizadu husi aumenta ameasa siguransa asimetriku iha forma siguransa ameasa transnasional. Aktu pirataria, kontrabandu ba arma no explosivu, tráfiku umanu, tráfiku droga, violasaun ba teritóriu, terorismu, *lavagem dinhero* ka fase osan no seluk-tan hanesan kestaun importante iha situasaun dadaun ne'e.<sup>33</sup>

Nune'e mos presiza konsidera oinsa forsa militar no siguransa Timor-Leste nian iha manutensaun ba soberania nasional. Mesmu jeralmente ASEAN adopta sistema ne'ebé

<sup>31</sup> Hato'o husi Vise Ministru Negósiu Estranjeiru no Kooperasaun, Roberto Soares iha enkontru ne'ebé organiza husi ONG Luta Hamutuk iha tinan 2015.

<sup>32</sup> ASEAN Charter, artigu 2, número 2 alinea b.

<sup>33</sup> Jurnal Universitas Pertahanan (UNHAN) - Indonesia, 2015.



akordadu ona husi autór estadu nian.<sup>34</sup> Maibé imposivel ida ne'e la utiliza husi individu ka grupu hodi aproveita opurtunidade ida ne'e hodi halo transaksauun ilegal ka aktu terorismu ne'ebé lori perigu ka ameasa ba siguransa nasionál.

Ho ida ne'e Timor-Leste presiza preparasaun husi elementu oin-oin husi sosiedade hodi hasoru ameasa hirak ne'e iha ASEAN hodi kontribui no defende soberania nasionál iha rejaun. Ida ne'e tuir difinisaun husi Lei N° 2/2010 Lei Siguransa Nasional artigu 11 kona-bá Polítika Siguransa Nasional ho nia definisaun "Estadu hala'o konjuntu ida koerente ba prinsípiu, objetivu, orientasaun no sasukat ka medida sira hodi adopta ba defeza integrada husi ninia elementu esensial sira". Polítika Siguransa Nasional ho nia karakterística nasional, integradu, global no permanente.<sup>35</sup> Nune'e atu hatan ba ameasa no risku sira ba siguransa nasional sei tau atuasaun integrada husi komponente no unidade sira husi Sistema Integrado Siguransa Nasional nian.<sup>36</sup>

Iha sorin seluk, prezensa kooperasaun internasional iha área oin-oin, nune'e diplomasia hanesan papel importante ida iha negosiasaun sira hodi utiliza ba interese nasional. Iha setór defeza no siguransa nian presiza konsidera papel diplomasia hanesan estratejia ba defeza nasional nune'e bele evita konflitu ne'ebé akontese hodi hasoru kompleksidade ASEAN nian hanesan "merkadu livre ASEAN" ne'ebé involve interese pesoal no grupu ho problema ne'ebé kompleksu mos.

Nune'e, governu presiza prepara medida diplomasia ne'ebé sei uza hodi atende konflitu oin-oin no negosiasaun internasional sira nune'e bele minimiza konflitu sira. Portantu entre esforsu diplomasia ho defeza nasional presiza tebes hodi salvaguarda interese nasional.

Ida ne'e bele haree iha kontestu diplomasia defeza nian hanesan esforsu no tentativa hodi proteze interese nasional iha âmbitu relasaun internasional ne'ebé inklui kestaun soberania nasional, territorial, aumentu kapasitasaun, negosiasaun akizisaun ekipamentu, salvaguarda siguransa iha rejaun, negosiasaun iha kontestu bilaterais, rejonal no multilaterais defeza no siguransa.<sup>37</sup>

Situasaun iha leten ne'e, hanesan dezafiu no medida sira ne'ebé Timor-Leste sei foti wainhira adere ba ASEAN. Esforsu sira ne'e indiretamente sei obriga Timor-Leste hodi dezenvolve no mellora sistema ne'ebé Timor-Leste iha. Portantu, Timor-Leste sai membru ASEAN la'ós tanba deit NASAUN ne'ebé lokaliza iha rejaun Sudeste Áziatiku maibé importante liu hola pepel importante iha organizasaun rejonal ne'e iha pilar sira ASEAN nian.

Nune'e mos estadu membru seluk konsidera Timor-Leste hanesan NASAUN ne'ebé meñor liu tanba deit la konsege rezolve ka la kumpri nia obrigasaun iha problema ka

<sup>34</sup> Jurnal Universitas Pertahanan (UNHAN) - Indonesia, 2015.

<sup>35</sup> Lei N° 2/2010 Lei Siguransa Nasional, artigu 12, alinea a to'o d.

<sup>36</sup> Lei N° 2/2010 Lei Siguransa Nasional, artigu 18.

<sup>37</sup> Jurnal Universitas Pertahanan (UNHAN) – Indonesia, 2015.



asuntu kiik ruma. Hanesan dadaun ne'e estadu membru balu sei iha dúvida no objesaun ba Timor-Leste nia pedidu adesaun tan razaun estabilidade política no siguransa inklui preparativu husi Timor-Leste hodi hasoru kompleksidade iha ambiente ASEAN nian.

## 2. Merkadu livre ASEAN

Husi aspetu ekonómiku nian, Timor-Leste tenke tuir akordu sira ASEAN nian kona-bá komersiu livre.<sup>38</sup> Portantu determinasaun espíritu integrasaun ekónomia ASEAN nu'udar pilar importante hodi avansa no aselera prosesu CEPT - AFTA (Common Effective Preferential Tariff - ASEAN Free Trade Area) Preferencial Efetivu Tarifa Komún, para liberaliza tarifa ba produtu iha nível inter-rejiaun ASEAN hodi nune'e vizaun ASEAN 2020 bele kria sistema merkadu unidade ka livre iha ASEAN nia laran.

Area Komersiu Livre ASEAN (AFTA) signifika katak sistema komersiu ne'ebé liberta autór exportadór no importadór husi impedimentu tarifa no non-tarifa ba sasán hirak ne'ebé exporta no importa entre nasaun membru ASEAN no parseiru sira wainhira kria konkordansia iha nível implementasaun ba zona komersiu livre. Objetivu husi konteudu konkordansia implementasaun AFTA maka atu aselera atividade sira komersiu hodi atrai interesse investór husi nasaun seluk ka fora rejiaun ASEAN hodi hanaran Investementu Direita Estranjeirus/*Foreign Direct Investments* (FDI). Hasa'e volume komersiu intra-rejiaun no dezenvolve mekanizmu kompetisaun produtu entre membru sira ASEAN hodi kompete no hasoru merkadu livre mundial.<sup>39</sup>

Objetivu AFTA hodi redus tarifa to'o 0-5% ba sasán ne'ebé determina iha konkordansia no forma rejiaun komersiu livre iha ASEAN hahú 2003 to'o 2011. Implementasaun AFTA konsidera hanesan prosesu evolusaun ne'ebé leva tempu naruk hodi adopta mekanizmu komersiu livre iha akordu Preferencial Efetivu Tarifa Komún (CEPT) nomós integrasaun komunidade ekonomia ASEAN iha 2015.<sup>40</sup> Vizaun ASEAN 2020 iha area ekonomia maka oinsa kria sistema integradu hodi implementa no aselera prosesu integrasaun ekónomia entre membru sira ASEAN no parseiru sira ASEAN nian.

Nune'e relatório ONG La'o Hamutuk hato'o relasiona kondisaun ekónomia Timor-Leste wainhira sai membru ASEAN no tenke tuir akordu merkadu livre ho preokupasaun katak Timor-Leste ohin loron iha kapasidade kiik-oan liu atu produs sasán ne'ebé bele fa'an

<sup>38</sup> La'o Hamutuk, 2010. Akordu merkadu livre (*FTA – Free Trade Agreement*) iha entre nasaun rua ka liu. Akordu sira ne'e obriga governu atu tuir regra balun kona-bá sira nia política no lei ekonomia no sosial. Akordu sira ne'e bele inklui regra kona-ba investimentu, taxa, subsidiu, sistema finansa, agrikultura, tulun ba setór privadu no público.

<sup>39</sup> Joseph E. Stiglitz.(2006) Making Globalizations Work. W.W. Norton & Company, Inc. New York.p.138-140. Sira iha relatório ONG Dili Institute of Strategic and International Studies (DISIS) kona-bá Transformasaun ASEAN no Polítika Estranjeiru Timor-Leste ba Atmosfera Area Komersiu Livre ASEAN.

<sup>40</sup> AFTA Reader; Volume V the Sixth ASEAN Summit and the Acceleration of AFTA. ASEAN secretariat December 1998.p.25-26. Sita iha relatório ONG Dili Institute of Strategic and International Studies (DISIS) kona-bá Transformasaun ASEAN no Polítika Estranjeiru Timor-Leste ba Atmosfera Area Komersiu Livre ASEAN.



iha ekónómia formal (ekonomia ne'ebé uza osan). Tanba akordu merkadu livre ASEAN nian sei prevene ekónómia atu dezenvolve tuir lolós nia dalan, iha futuru, ema Timor-oan sei nafatin ladun iha kbiit atu halo serbisu ka produsaun, no dependensia ba importasaun sei sai maka'as.<sup>41</sup>

Iha setór agrikultura nian, Timor-Leste nia populasaun 80% resin sei moris husi setór ne'e. Maske nune'e Timor-Leste nia ekónómia sei depende hela ba rendimentu husi rikusoin mina no gas ho orsamentu estadu besik 90% mai husi seitór ne'e. Oras ne'e agrikultór barak labele dezenvolve sira nia ekónómia maske sira iha rikusoin agrikultura nian ne'ebé boot no la iha kbiit atu kompete ho produsaun agrikultura husi rai liur. Bele haree iha realidade katak Timor-Leste agora nakonu ho sasán agrikultura oin-oin ne'ebé importa husi rai liur, hanesan foos, liis, sabaraka, fehuk-ropa no seluk-seluk tan ne'ebé tuir lolós bele produz iha rai laran. Hasoru problema sira hanesan ne'e governu seidauk halo política ida atu proteze produtu agrikultór Timor-oan nian, no ita nia agrikultór sira rasik simu deit situasaun ne'e tanba ladun iha kuñesimentu no informasaun naton kona-bá oinsa sira nia produtu bele hetan folin diak.<sup>42</sup>

Maske governu ho política ida katak “povu kuda governu sosa” maibé importasaun kontinua aumenta iha tinan hirak ikus ne'e.<sup>43</sup> Ironiku liu tan, política seluk kona-bá “loja do povu” maibé fa'an supermi no la'ós fa'an povu nia produtu.<sup>44</sup>

Relatório La'o Hamutuk mos preokupa kona-bá taxa. Iha ne'ebé tinan 2008 Timor-Leste hatun nia taxa importasaun no esportasaun nune'e Timor-Leste hanesan nasaun ne'ebé nia taxa kiik liu iha mundu. Relatório ne'e mos hato'o katak taxa ne'ebé hatun maibé la hatun folin ba konsumidór maibé hatun deit rendimentu governu nian. Nune'e wainhira sai membru ba organizasaun rejiionál ne'e, ASEAN FTA nia membru tenke hamos sira nia taxa ba sasán rihun ba rihun. Ida ne'e prevene Timor-Leste atu uza taxa atu proteje nia industria ne'ebé foin hahu.

Iha sorin seluk, nasaun kiik no kiak dalabarak iha falta ba ema ho skill no esperiensiia ne'ebé diak atu analiza merkadu, lei merkadu no negosiasaun akordu merkadu nian. Tanba ne'e sira la komprende saida maka komitmentu ne'ebé sira halo. Akordu ASEAN mos bele prevene Timor-Leste atu uza estratégia barak ne'ebé uluk nasaun riku sira mos uza. Obrigasaun ASEAN bele diriji Timor-Leste ninia política, lei, ekónómia no prioridade dezenvolvimentu.<sup>45</sup>

Iha setór komersiu nian, Timor-oan barak mos hala'o sira nia moris iha komersiu ka

<sup>41</sup> Relatório ONG La'o Hamutuk, 2010.

<sup>42</sup> Relatório ONG La'o Hamutuk, 2010.

<sup>43</sup> Direcção Geral de Estatística, Timor-Leste. Annual Reports 2014, External Trade Statistics no Monthly Reports November 2015.

<sup>44</sup> Programa Governu nian iha IV Governu Konstituisional 2007 – 2012 no Programa V & VI Governu Konstituisional 2012 – 2017. Partikularmente Ministériu Komersi Industri no Ambiente (MCIA).

<sup>45</sup> Relatório ONG La'o Hamutuk, 2010.



negosianta kiik ka boot. Maske nune'e, negosianta ka komersiante sira ne'e barak maka la iha formasaun diak kona-bá komersiu nian. Iha Timor-Leste laran tomak oras ne'e komersiante husi rai liur barak maka domina fatin estratéjiku no produtu estratéjiku sira. Bele haree ho loja Xina no nasaun balu husi membru ASEAN nian ne'ebé halekar husi Dili tama to'o munisipiu sira, tunu sate, halo *terang-bulan* no fa'an dosi iha Dili nia dalan ninin sira. Ba nivel ne'ebé aas liu emprezáriu Timor-oan sira barak nia serbisu kontinua hetan krítika maka'as tanba kualidade ne'ebé la diak, nune'e sei susar atu kompete ho emprezáriu sira husi rai liur ka nasaun sira husi ASEAN.<sup>46</sup>

Nune'e adesaun Timor-Leste ba ASEAN sei hasoru obstaklu barak, maske politikalmente Timor-Leste iha ona kondisaun para sai nu'udar membru foun ASEAN. Maibé prinsipal liu maka oinsa Timor-Leste bele hetan vantajen iha interasaun ekonómika ba liberalizasaun komersiu entre membru ASEAN. Maske Timor-Leste iha ona Vizaun 2030 ba programa dezenvolvimentu nasional maibé oinsa maka ministériu relevante bele interpreta asuntu hirak ne'e iha planu prioridade ba jestaun governu ba parte kooperasaun ekonómia rejiaun.<sup>47</sup>

Maske nune'e, Timor-Leste bele hili opsaun balu hanesan rekomenda tiha ona husi ONG DISIS iha tinan 2011 kona-bá Transformasaun ASEAN no Políтика Estranjeiru Timor-Leste ba Atmosfera Area Komersiu Livre ASEAN. Portantu Timor-Leste tenke determina no forma parseirus estratéjia iha konstelasaun kooperasaun ekonómia liu-liu iha nasaun parseiru sira ASEAN. Komitmentu política Timor-Leste hodi sai nu'udar membru foun sira iha rejiaun ASEAN sei inferenta obstaklu barak inklui oinsa maka bele marka kompetisaun entre ASEAN iha nivel implementasaun Area Livre Komersiu ASEAN 2011 to'o 2018, tempu implementasaun ida ne'e bazeia ba nasaun ASEAN-4 hanesan, Cambodia, Laos PDR, Myanmar, Vietnam inklui Timor-Leste, komunidade ekonómia ida ne'e hanaran CMLVT. Timor-Leste seidauk manda pedidu liu husi karta aksesaun (hodi hola parte iha mekanizmu CEPT) mais iha futuru tenke hola parte ekuantu Timor-Leste hakarak integra iha sistema komersiu livre rejiaun ASEAN.

Iha parte seluk Timor-Leste liu hosi mekanizmu ASEAN bele estabelese *Comprehensives Economic Partnership Agreement* iha nivel bilateral nu'udar pasu primeriu hodi integra-an iha nivel Komunidade Ekonomia ASEAN hodi implementa sistema CEPT iha merkadoria livre ASEAN.<sup>48</sup>

<sup>46</sup> Relatório ONG La'o Hamutuk, 2010.

<sup>47</sup> Relatório ONG DISIS, 2011.

<sup>48</sup> Freitas, Antonio. Transformasaun ASEAN no Políтика Estranjeiru Timor-Leste ba Atmosfera Area Komersiu Livre ASEAN. DISIS. 2011



## Konkluaun no rekomendasaun

Timor-Leste lokaliza iha rejiaun Sudeste Áziatiku to'o agora hanesan úniku NASAUN ne'ebé la'ós membru ba ASEAN. Nune'e mos prosesu adesaun Timor-Leste hanesan úniku NASAUN ne'ebé nia prosesu la'o naruk tebes ho rigorozu. Esforsu adesaun ida ne'e la'ós deit husi parte Timor-Leste maibé involve mos estadu membru balu ASEAN nian hanesan Indonezia, husi ASEAN rasik to'o ninia final lolós maka avaliasaun husi peritu ASEAN nian ba Timor-Leste nia preparativu. Avaliasaun dahuluk ba pilar ekonómiku, política-siguransa no ikus liu avaliasaun ba pilar sosiu-kultural iha tinan rohan 2015.

FM fiar katak ho avaliasaun ne'ebé liu dadauk sei fó konkluaun final ba Timor-Leste nia preparativu no bele konvense estadu membru ASEAN balu ne'ebé durante nia sei iha objesaun ba Timor-Leste nia preparativu, situasaun política no siguransa. Iha ne'ebé konsidera Timor-Leste hanesan obstaklu ba Komunidade ASEAN no seidauk bele hasoru kompleksidade sira iha ambiente ASEAN nian.

Relatóriu ne'e mos identifika husi situasaun ne'ebé uluk sai hanesan dúvida no objesaun ba estadu membru ASEAN balu, hetan mudansa signifikativu tebes no dadaun ne'e Timor-Leste goja hela ambiente ida paz no harmonia hodi aselera dezenvolvimentu iha setór oin-oin. Maske nune'e aspetu preparativu fundamental tebes ba Timor-Leste hodi prepara-an didiak wainhira adere ba ASEAN. Portantu adere ba ASEAN la'ós deit razaun lokalizasaun jeográfika maibé papel importante ida hanesan estadu membru hodi hala'o nia obrigasaun iha ambiente ida kompleksu Komunidade ASEAN nian.

Rekomendasaun:

1. Governu Timor-Leste presiza aselera aspetu preparativu nian liga ho pilar política-siguransa no ekonómiku. Nune'e wainhira adere ba ASEAN bele hola papel importante no hala'o nia obrigasaun hanesan estadu membru.
2. Governu Timor-Leste presiza prepara rekursu umanu hodi bele atende serbisu prinsipal sira iha ASEAN nian. Inklui rekurusu finanseiru no infra-estutura hodi fasilita serbisu sira ASEAN nian wainhira sai hanesan membru ASEAN.



## Bibliografia

Adek Triana Yudhaswari, dkk (2011). Ayo Kita Kenali ASEAN. Direktorat Jenderal Kerja Sama ASEAN, Kementerian Luar Negeri RI, Jakarta 2011.

ASEAN 2025: FORGING AHEAD TOGETHER. The ASEAN Secretariat Jakarta, 2015.

ASEAN Belum Siap Terima Timor Leste. "Saya tidak melihat penolakan, hanya masalah timing dan kesiapan dari kedua belah pihak." Disponivel iha: <http://dunia.news.viva.co.id/news/read/219287-asean-belum-siap-terima-timor-leste>. Asesu iha loran 15 fulan Novemburu tinan 2015.

ASEAN Community 2015. Disponivel iha: <http://www.asean.org/asean/aboutsean/overview>. Asesu iha lorn 28 fulan Outobru tinan 2015.

ASEAN Member States. Disponivel iha: <http://www.asean.org/asean/about-sean/overview>. Asesu iha loran 30 fulan Outobru tinan 2015.

Annual Reports 2014, External Trade Statistics. Direcção Geral Estatísticas, Ministério Finansa Timor-Leste, 2014.

CNN Indonesia. Keanggotaan Timor-Leste di ASEAN Tinggal Tunggu Waktu. Disponivel iha: <http://www.cnnindonesia.com/internasional/20150828161413-10675220/keanggotaan-timor-leste-di-asean-tinggal-tunggu-waktu/>. Asesu iha loran 28 fulan Outobru tinan 2015.

Freitas, Antonio. Transformasaun ASEAN no Políтика Estranjeiru Timor-Leste ba Atmosfera Area Komersiu Livre ASEAN. DISIS. 2011

Global Risk Insights. Timor-Leste bids for ASEAN membership. Disponivel iha: <http://globalriskinsights.com/2015/11/timor-leste-bids-for-asean-membership/>. Asesu iha loran 4 fulan Novemburu tinan 2015.

Intervista Jornalista Tony Smith husi Television One, New Zealand ho Jose Ramos Horta iha Dili, tinan 1975. Disponivel iha: [https://www.youtube.com/watch?v=mavWhk\\_JBYk](https://www.youtube.com/watch?v=mavWhk_JBYk). Asesu iha loran 3 fulan Novemburu tinan 2015.

Jurnal Universitas Pertahanan Indonesia, 2015.

Konstituisaun Repúblika Demokratika Timor-Leste.

Lei N° 2/2010, Lei Siguransa Nasional, Timor-Leste.



Monthly Reports November 2015. External Trade Statistics. Direcção Geral Estatistics, Ministériu Finansa Timor-Leste, 2015.

Primeiru Ministru Dr. Rui Maria de Araújo hato'o ba media nasioal hafoin fila husi vizita iha Indonezia no Sekretariadu ASEAN nian. Disponivel iha: <http://www.indiario.com/2015/08/31/tl-bele-sai-memburu-asean-tinan-nee/>. Asesu iha Iorom 26 fulan Outobru tinan 2015.

Planu Estratéjiku Dezenvolvimentu Nasional (PEDN) Timor-Leste 2012 – 2030.

PRESS RELEASE. Timor-Leste opens ASEAN National Secretariat to intensify its preparations to join ASEAN. ASEAN Secretariat, 2 February 2009. Disponivel iha: <http://www.asean.org/archive/PR-TimorLeste-1.pdf>. Asesu iha Iorom 5 fulan Novembru tinan 2015.

The ASEAN Charter. Disponivel iha: <http://www.asean.org/archive/AC-Indonesia.pdf>. Asesu iha Iorom 28 fulan Outobru tinan 2015.